



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

17 Feveireiru 2020

Komiasun A Parlamentu Nasionál halo konsulta públiku ba Esbosu Lei Podér lokál no Desentralizasaun Administrativa no Lei Eleitorál Munisipál

Komiasun A Parlamentu Nasionál (PN), iha Kinta-Feira 13 Feveireiru 2020 halo konsulta públiku ba Esbosu Lei Podér lokál no Desentralizasaun Administrativa no Lei Eleitorál Munisipál iha Munisipíu Covalima. Konsultasaun ne'e hetan partisipasaun hosi autoridade lokál, diretór munisipál, xefi suku, representante empreezáriu no representante partidu polítiku sira iha munisipíu refere.

Iha introdusaun ba lei rua ne'e, Prezidente Komisaun A, Deputada Carmelita C. Moniz konsidera konsultasaun ba esbosu Lei Podér Lokál no Desentralizasaun Administrativa nomós Lei Eleitorál Munisipál importante. Nune'e, presiza rona hanoin sira hosi parte hotu hodi bele prodús lei sira ne'e kualidade no bele refleta ema hotu nia interese. Deputada ne'e mós haktuir katak lei rua ne'e Prezidenti Repúblika, Sr. Francisco Guterres Lu-Olo veta iha lejislatura datoluk nian. Razaun Prezidente Repúblika nian mak katak Artigu 50 Númeru 2) hosi esbosu lei ne'e la prienxe rekezitu legál no demokrátiku no Prezidenti Repúblika hateten katak membru assembleia munisipál nian tenke hothotu eleitu liuhosi eleisaun mak bele.

“JSMP apresia tebes Parlamentu Nasionál, partikularmente Komisaun A ne'ebé promove partisipasaun públiku iha prosesu halo lei hodi asegura katak lei sira ne'ebé Parlamentu Nasionál prodús refleta duni realidade no interese povu tomak nian,” dehan Diretór Interinu JSMP, Casimiro dos Santos.

JSMP mós hanoin katak bainhira Timor-Leste implementa ona polítika desentralizasaun administrativa mak sei iha pontensialiade ba korrupsaun atu aumenta buras, nune'e importante atu Parlamentu Nasionál konsentra no prodús uluk Lei Anti-Korrupsaun molok tama ba desentralizasaun totál ba administrasaun Estadu nian. Nune'e, Estadu bele iha kbiit naton, partikularmente Ministériu Públiku no Komisaun Anti Korrupsaun (CAC) hodi prevene no kombate korrupsaun.

Durante diskusaun, asuntu ne'ebé sai preokupasaun hosi partisipante sira mak hanesan kestaun kona-ba Artigu 50 hosi esbosu Lei Podér lokál no Desentralizasaun Administrativa kona-ba representante veteranu na'in 5 ne'ebé sai membru Assembleia Munisipál la liu hosi eleisaun no la iha direitu votu, fahe rikusoin sira entre munisípiu sira, relasaun entre munisípiu sira no kompeténsia sira liga ho relasaun internasionál ho nasaun sira.

Hatan ba kestaun hirak ne'e, Prezidente Komisaun A konsidera katak preokupasaun sira ne'e iha razaun no sei toma nota hodi inklui iha relatóriu hodi bele sai materia diskusaun iha Komisaun A nian ba lei rua ne'e.

Enkuantu Artigu 50 númeru 2) kona-ba kompozisaun membru assembleia nian ne'ebé ko'alia kona-ba direitu sira no númeru hosi veteranu sira na'in 5 ne'ebé iha direitu hanesan membru assembleia sira seluk

ezetu direitu atu vota, Prezidente Komisaun A esplika katak intensaun hosi tau artigu ida ne'e mak tanba konsidera papél veteranu nian agora importante tebes iha nasaun ne'e no sira mak funda nasaun ne'e ho ida ne'e persiza tebes sira-nia akompañamentu hodi nafatin kontribui ba nasaun ne'e.

Relasiona ho fahe riku soin sira entre munisípiu sira, deputada ne'e esplika katak sei iha lei foun sira tuir mai hodi kompleta lei ida ne'e. Hanesan ezemplu ida mak esbosu kodígu mineiru ne'ebé mak sei trata asuntu sira ne'ebé liga ba pursentu hira mak sei hetan hosi munisipíu sira no hira mak tama ba kofre estadu hodi distribui mós ba munisipíu sira seluk no tanba sei iha interdependénsia ba malu. Nune'e governu sentrál sei haree atu fahe rikusoinsira ne'e hanesan sein halo diskriminasaun.

Enkuantu relasaun entre munisipíu sira ne'e, sei estabelese tuir interese munisipíu sira-nian ba asuntu saida mak sira hakarak kria ho munisipíu sira seluk. Iha relasaun internasionál nian sei regula mós regra balun ne'ebé munisipíu sira bele halo no balun ne'ebé labele halo no kabe ba kompeténsia governu sentrál nian.

Iha konsultasaun ne'e, JSMP mós nota katak ekipa tékniku no deputadu sira la prepara materia esbosu lei sira ho língua Tetun ne'ebé sai mós nu'udar língua ofisiál ne'ebé familiár ho comunidade sira atu kompriende no la súmariza mós kona-ba importánsia husi lei rua ne'ebé sai nu'udar informaensaun badak hodi bele fasilita partisipante sira iha prosesu diskusaun.

Aleinde ne'e, materia ka esbosu lei sira ne'e la fahe antes halo konsultasaun públiku hodi bele fasilita partisipante sira bele lee no entende didi'ak intensaun hosi artigu sira ne'ebé define iha lei sira ne'e.

Nune'e, JSMP rekomenda atu Parlamentu Nasionál, partikularmente Komisaun A hadi'a nia mekanizmu konsultasaun liuliu atu fasilita materia sira antes ho língua Tetun no súmariza informaensaun badak hosi lei sira ne'e atu nune'e bele fasilita partisipante sira-nia partisipasaun ativu iha prosesu konsultasaun públiku ne'e. JSMP mós husu atu komisaun A bele kontinua halo konsultasaun públiku ba projetu lei rua ne'e iha munisípiu sira seluk hodi esplora hanoin sira antes tama iha diskusaun no aprovasaun iha plenaria.

Atu hetan informaensaun liutan favór kontaktu direitamente:

Casimiro dos Santos

Diretór Ezekutivu Interinu JSMP

Email: casimiro@jsmp.tl

Telefone: 77257466 | 3323883

Website: <http://jsmp.tl/>